

Adam na Laman

Unda nos famia por bai landa? Tempu ku nos tabata mucha tabatin hopi opshon: Zeebad, Fòrn'i Kalki, Lac, Playa Lechi, Punt Vierkant, èts. Ma poko poko e opshonnan a desparsé. Hotèlnan ta okupá algun di e sitionan, prohibiendo habitantenan di nos isla di hasi uso di “nan” bich.

Ma den último añanan e desishon aki a bira muchu mas kompliká pa mayornan responsabel, pasobra kua bich tin na nos isla unda por hiba bo famia pa pasa algun momentu alegre na laman sin hañaabo ku desnudes di un forma òf otro?

Resientemente e situashon aki a ser aksentuá atrobe ora kuater hòmber di nashonalidat brasileño a disidí di bai landa blo sunú na un di e bichnan públiko mas popular, Pink Beach. Ta di aploudí ku diferente hende a pidi asistencia polisial. Ta di aploudí ku polis a bai papia ku e hòmbernan. Ta di aploudí ku e turistanan a bisti nan paña.

Ma tòg e insidente ta preokupante pa vários motibu. Pa di promé, algun akto ilegal ta aseptabel miéntras otronan nò? Nos leinan ta prohibí TUR forma di desnudes públiko. Ma den último añanan diariamente hende muhé tòplès ta frekuentá nos playanan. Kisas asta tabatin hende muhé tòplès na Pink Beach na momentu ku polis a pidi e brasileñonan pa bisti paña. Pakiko ta aktua kontra un mientras ta “kijk door de vingers” pa ku e otro akto ilegal? Trahe di Adam ta prohibí ma no di Eva?

Un di dos preokupashon ta ku e insidente aki ta un otro atvertensia ku nos komunidat ta riba kamina di dekadensia moral. Kiko nos kier men?

Vários aña pasá, nos isla a keda di **shòk** ku algun turista tin un rabia riba paña. “**Esei si ta di mas,**” nos a haña. Tòg nos a akomodá nan na un sitio isolá tras di un muraya di palu pa tapa bista, i prohibí hende lokal di bishitá e sitio. Ku tempu nos a **kustumbrá** ku e idea di un hotèl sunú na nos isla.

Ma e postema di indesensia no a keda tras di e murayanan. Nos a keda di **shòk** ora hende muhé a kana tòplès na nos bichnan. “**Awor si ta di mas,**” nos a reakshoná. Ma aparentemente nos a **kustumbrá** ku e damanan tòplès.

Awor na bich ta kita e delaster drachi di paña den pleno bista di mucha, hóben, adulto. Un biaha mas nos ta di **shòk**. Un biaha mas nos ta reakshoná, “**Esaki si ta di mas!**” I un biaha mas, despues di tempu, nos lo **kustumbrá** ku landamentu blo sunù...si outoridatnan konserní no ta pone pia abou i aktua awor.

Hende ta sigui un patronchi ora nan ta ser introdusí na kondukta desaprobá. E promé reakshon ta pa keda di shòk i **konden'è**. Ma despues di ser eksponé n'è pa basta tempu, nan lo kuminsá **tolerr'è**, i porfin **asept'è**. Esei ta presis loke ta pasando den nos komunidat! Awe nos ta aseptá e maldat ku ayera nos a kondená komo “di mas. “ Ta visto ku nos komunidat no ta riba e bon kamina!

Ningun komunidat por sigui e patronchi di kondená-tolerá-aseptá, sin ser **kontaminá!** Beibel ta hasi algun pregunta retórikò: “Un hende por tuma kandela den su skochi sin kima su paña? Of un hende por kana riba karbon kayente sin kima su pia?” (Proverbio 6:27-28). Ya kaba nos a tende di mucha muhénan di nos isla—nos yunan—ku ta bai landa tòplès. Skritura ta atvertí “...un poko zürdeg por hasi henter e mansa bira zür...Saka afó anto e zürdeg” (1 Korintionan 5:6-7

Ma nos tin un fobia di ofendé e turista debí ku nos ekonomia ta basá riba turismo. Ora nos ta mira un turista nos ta mira \$. P'esei nos no ke bis'è pa bisti paña pa e no hisa bela bai fo'i dj'aki ku su dòlernan tan kudishá. Ma Aruba ta hasi nèt esei sin perhudiká nan industria turístiko. Ademas, tin kos ku muchu mas balor ku e sèn ku turismo ta produsí, manera balornan spiritual i moral. Nos mester protehá e moralidat di nos yunan i di nos komunidat. Nos no por hasi esei si nos ta pèrmití e turista pa imponé su normanan di moralidat (òf falta di norma) riba nos komunidat.

P'esei nos ta aploudí e akshon di polis! I nos ta enkurashá tur esnan konserní ku e industria turístiko pa notifiká e turista ku na nos isla siertu kondukta ta inaseptabel i aktua kontra esei. Ta tempu pa nos pone pia abou pa tantu trahe di tantu Eva komo di Adam na laman.